

太上一乘海空智藏經卷之二

月二

哀歎品

爾時海空智藏即從座起稽首作禮長跪曲
 拳白天尊言如是我所說真實甚深微妙功德
 不可思議我今於是思念萬兆造化之由云
 何衆生一切諸法各有道性從因緣生以是
 因緣應有縛耶應無縛耶是五陰耶是六塵
 耶我今思惟念念生滅如是生滅誰是縛耶
 誰非縛耶誰是解耶誰非解耶如是因緣因
 此五陰生彼五陰以此陰滅不生彼陰云何
 五陰能染煩惱念念生滅煩惱云何爾時
 天尊答海空言善哉善哉善男子諦聽諦聽
 我當為汝分別解說善男子譬如衆生臨欲
 終時生大憂苦父母妻子宗親圍繞號哭懊
 惱瞻仰惶怖莫知依救雖有五情而無覺知
 肢節戰動不能自持身體虛冷氣命欲盡即
 見所修罪福報應相隨業受生或生三塗五
 道之趣或生人間隨其功業無不悉知善男
 子譬如日沒臨欲沒時山陵堆阜影現東移
 理無西沒衆生業果亦復如是此五陰滅彼

五陰生譬如燈明燈生闇滅燈滅闇生善男
 子譬如泥瓶泥與瓶合泥滅瓶成而是泥相
 終不名瓶瓶雖非泥不餘處來以泥因緣而
 生是瓶善男子此五陰滅彼五陰生以此五
 陰終不變為生彼五陰彼之五陰亦非自生
 亦非餘生因此陰故生彼五陰亦如泥瓶泥
 滅瓶成體雖無差隨時各異以是之故因此
 五陰生彼五陰以此陰滅我說彼陰善惡
 陰觀察善惡父母文會煙煨合時隨業因緣
 得受生處於母生愛於父生慈父母念時心
 生歡喜如是緣故悉顛倒因無愛見愛無樂
 見樂無常見常如是倒見作善惡因煩惱作
 業業作煩惱是名結縛以是義故念念生滅
 若有善人親近知識便得聞見三洞靈寶十
 部妙文以聞法故恭敬禮拜圍繞讚歎讀誦
 書寫一心受持清淨供養六時思惟存念一
 切無有絕時於是時中而坐懺悔懺悔心已
 即生歡喜歡喜心故捨遠妻子獨處山林存
 真念道以是因緣於生死中即得解脫滅諸
 煩惱如燈破闇名之為滅度以是義故名因

緣滅

於是衆中有一童子名曰善才從座而起接
 足道前安庠雅步稽首作禮白天尊言天尊
 今者演說甚深微妙功德非是下乘之所度
 量云何而言現此五陰滅彼五陰以此五陰
 終不變為生彼五陰如此五陰云何煩惱之
 所繫縛若有煩惱不應生滅若有生滅滅已
 云何生彼煩惱五陰是以因緣唯願天尊分
 別解說今諸衆中得釋所疑爾時
 天尊答善才言善哉善哉善男子是汝等衆
 諦聽諦聽當為汝分別解說云何煩惱之所
 繫縛善男子以煩惱繫縛五陰離五陰已無
 別煩惱離煩惱已無別五陰善男子譬如木
 牀離木元牀離牀元木以是因緣衆生五陰
 亦復如是有煩惱故名繫縛無煩惱故名
 為解脫善男子譬如根眼開時見色閉時無
 見煩惱繫縛合散生滅更無別法衆生五陰
 亦復如是若有煩惱名為繫縛若無煩惱是
 名解脫以是因緣說煩惱者繫縛衆生煩惱
 若滅則無衆生離煩惱已無別衆生離衆生

已无別煩惱亦名煩惱繫縛眾生亦名眾生繫縛煩惱

善才又言若如是說眼不見眼指不自指刀不自割受不自受云何天尊說言煩惱繫縛煩惱何以故是煩惱者即是眾生是眾生者即是煩惱若言煩惱繫縛眾生當知煩惱繫縛煩惱爾時

天尊答善才言善男子如眼合時更无異法而來合也煩惱眾生亦復如是以是因緣我言煩惱繫縛眾生若有眾生離諸煩惱則得解脫是故我言眾生解脫

善才又言若有煩惱是繫縛者云何天尊說仙人住煩惱城亦應繫縛爾時

天尊答善才言善男子住有二種一者化住二者果住言化住者天尊上人住於煩惱實無煩惱何以故了煩惱相以是因緣為眾生故方便住也云何果住善男子是諸眾生未能捨離煩惱繫縛以繫縛故輪轉生死不見道性以不見故不得見我常樂之心以是義故常住三界煩惱繫縛以是因緣煩惱繫縛

即名眾生是眾生身即是煩惱爾時善才白天尊言眾生五陰空無所有以如是故誰有受教修行道德

天尊答善男子一切眾生皆有念心初念之心勤行精進生布施心如是等法念念相生以是因緣相續不斷故名修道

善才又言如是所說念念相生是念念生已念已來念未生也以是義故云何相續名為修道爾時

天尊答善才言如是如是實如所說善男子譬如燈明雖念念滅而有光明善能除闇念等諸法亦復如是善男子如眾人行雖念念滅亦令達所隨意東西譬如服藥雖念念滅亦能愈病譬如日月雖念念滅亦能增長樹林草木善才童子如汝所言所念念已云何相續善男子譬如人讚聲有大小不得一時而具五音前不至中中不至後大之與小俱念念滅以念念滅故久成妙音人之修道亦復如是善男子譬如人數一不至二二不至三雖念念滅而至千萬人之修道亦復如是善

男子譬如燈明燈念念滅初滅已不云後炭我滅滅生知是生滅遂成燈相

善才又言如是所說久修習道得證四天猶故進修慈悲不殺不淫不盜心不嫉妬口不兩舌飲酒食肉亦不能得淨妙國王云何而言於惡煩惱久修持戒而得道耶

天尊答言一切眾生雖於煩惱久修持戒善男子一切眾生不失道性雖生惡國以道力故得修妙國善男子譬如寶山在於惡林有一猛虎常依其中以是之故一切眾生飛鳥走獸絕跡此山无敢近者有一貧士存念思惟云何得往彼山採寶令我今日早得富有於是即便習諸毒藥往於山所爾時惡蟲聞其毒藥即便去離是諸貧士隨意採寶入於煩惱修持戒行久修成道亦復如是善男子譬如玉京有上妙藥松木黃精有人服之雖在惡國念念生滅以藥力故終不為患善才又言難於煩惱久修淨戒以是因緣諸學道士持戒定慧當知是人親近海空秘密藏地以如是故云何修戒云何定慧而得道

耶爾時

天尊言善才言善哉善哉善男子若有眾生受持禁戒但為自利人天富樂不能普為一切眾生不為擁護无上道法但為自養畏三惡道畏六畜道畏世王法畏世惡名便求現

劫如是護戒則不得名修習淨戒善男子云何名為修持淨戒若有一人度脫一切諸眾生者是名護持淨戒正法未度者度未解者解未修者修未行者行以是因緣修是戒時不見戒相不見修相不見我相不見報相善男子若能如是是則名為修習正戒善男子云何名為修習定慧若有一人自揚自度為已利養為已恩德不為眾生護持正法讀誦思惟為見貪欲諸業等罪男女等想三業盡行闡訟打辱更相殺害以如是故不名修習諸淨正法善男子若有眾生修習定慧於眾生中行平等心普念眾生得微妙法念諸眾生得正法輪為令眾生得大果相為令眾生思惟義味讀誦讚歎恭敬護持无上正法為令眾生住海空藏為令眾生得金剛慧靖定

思惟為令眾生速登昇玄為令眾生得無礙力為令眾生了真道相如是見時無分無別無分別相無彼無我無彼我相無憎無愛無憎愛相無貪無慾無貪慾相無修無習無修習相無因無果無因果相善男子若能如是

是則名為修習定慧海空之藏善男子若能破壞一切眾生貪慾等相是則名為修行智慧以修習故得壞疑心為修習道修習道故得見道性見道性故得入一乘海空之藏得入藏已為斷眾生諸生死法諸煩惱法一切諸魔既得斷已得入常樂清淨自在得入一乘海空法藏

善才又言如是所說無分無別是則名為海空之藏云何不言有分有別名海空藏爾時天尊答善才言善男子如是如是如汝所言有分有別名海空智藏是事不然何以故有始終故有生死故善才又言是生死法則無始終無始終故則名為常是名海空云何不言生死煩惱是海空智藏

天尊答言善男子是生死法悉有因果有因果故不得名為一乘海空何以故海空空相無因果故無始終故善才又言如是所說海空空相無因果無始無終云何說言以修習故得見道性從因

生天從因受樂海空常樂豈非因果耶云何說言海空空相無因果天尊答言善男子我說海空修習因者即是道性道性之性無生無滅無生滅故即是海空海空之空無因果無因果故以破煩惱以是因緣名為修習

善才又言如是所說道性之性無生無滅眾生道性為悉共有為各各有若共有者一人得入海空藏時一切眾生亦應俱得譬如兜譬或千或百若一人和百千亦和一人相怨百千亦怨道性亦爾一人得時一切亦得一人不得一切不得若各各有則是無常何以故可數量故云何說言眾生道性不一不二若各各有不應說言道性平等猶如虛空天尊答言善哉善哉善男子汝所難云眾生

道性不二不究竟平等猶如虛空一切衆生同共有之善男子深山有寶名曰上勝人若取之則成富有衆生道性亦復如是善才又言如是所說上勝寶者是一是多若是一者一人得已則應有盡山空無寶云何而言一切衆生修持淨戒得入一乘海空祕藏若是多者云何而言是海空者非一切法衆生道性亦如是耶

天尊答言善男子譬如一路或大或小一切衆生悉於中行無障礙故道性衆生亦復如是善男子譬如寶珠唯有一門雖有人多經遊出入無有逼迫亦復無人破壞寶珠而爾持去道性衆生亦復如是善男子譬如橋梁隨諸行人或重或輕以是橋梁無有增減衆生道性亦復如是

爾時善才白天尊言如是譬喻難可思量義味甚深其事不然何以故先者在路於後則妨云何而言無有障礙

天尊答言如汝所說義理不然是譬喻者即少分耳非一切耶若世間道則有障礙此彼

之異元有平等海空道性能令衆生無有障礙平等無二無有方所此彼之異如是正道能為一切衆生道性而作了因不作生因如彼然燈照了於物善男子一切衆生皆是煩惱無明因緣不可說言一大煩惱無明行已其餘應無一切衆生悉有無明因緣是故說言次第因緣一切平等衆生修無為正道斷諸衆生煩惱顛倒以是因緣名為平等了見諸法無彼無此無有障礙是故真人各香童子得智慧力了見他心

善才白言一切衆生身不一等或長或短天身人身畜生餓鬼地獄之身如是等身差別各異云何而言道性一耶

天尊答言善男子譬如鹽味置於諸物乃至水中皆悉有鹹物不名鹽鹽不名物乃至水中亦復如是名字雖變鹽性不失徧五味中皆悉有鹹若有飲水鹽味甚遍實不見鹽於水中衆生道性亦復如是維徧五道長短異身而是道性常一不異於是四衆得聞說已各懷踴躍歡喜无量俱起作禮各還本座

爾時海空智藏即起叩頭稽首道前作禮問言大慈天尊演說一乘海空寶藏微妙經典具足之相為衆生故說其義味甚深功德不可思議善哉天尊快說如是云何衆生住生死城起種種病或得身病或得心病如是之病令身口意作種種惡以作惡故輪迴三趣具受諸苦云何真仙上妙童子住於七寶光明王城相好具足智慧甚深常樂自在善能受持祕密寶藏思惟義味為諸衆生問訣經典令諸衆生以為依怙作是說已瞻仰尊顏即无他念爾時

天尊和聲答言善哉善哉善男子海空智藏為衆生故作如是問作如是問作如是說欲令利益一切衆生開盲冥者善男子云何衆生住生死城起種種病善男子我於往昔說此經時有七千人俱在聞聽於是衆中三百三人生无慧念起種種言誹謗正法生不信心從座而退各還本國爾時諸人裝持船舫欲度海水於時惡風吹其船舫漂流大海墮无明國即得重病身病心病意病口病如是

等病復生念言我等眾生云何修行嬰受斯苦即發念言一乘海空智慧之藏一唱說言於是諸身悉無病瘡以是因緣輪轉生死在三惡道受諸苦惱遂令遠離三乘正路墮無明國有人之形心同野獸生長惡根食噉人物日生日死哭聲盈路永無止息善男子真人童子觀其因緣於己身心生大怖畏捨離眾惡住七寶城常念思惟一乘海空秘密之藏善男子譬如大王以四猛虎令人養食瞻視卧起摩洗虎身若令一虎生嗔恚者我依律法當斷汝命爾時其人聞王教令心大怖畏惶惶莫所於是思惟捨虎而走爾時大王聞人已走即遣少剛拔刀隨之其人迴顧見後少剛即便疾走是時少剛以惡方便即藏持刀密遣一人假為親善而語之言汝可來還其人不信即入空城欲自隱匿既入城中視諸精舍悉空無人既不見人即便坐卧聞空中聲咄哉男子此城空曠无有人居今夜當有四百賊來汝設遇者命不安全汝當云何而得免之爾時其人益增恐怖復捨而去

路礙河水漂漂流无有船舫心又愁惱即取種種草木為械復更思惟我必住此當為猛虎之所危害若度此河械不可依當沒水死終不為彼猛虎傷害即推木械置之水中身倚其上還動手足截流而去當到彼岸安穩如故心大歡喜善男子一切眾生得聞受持一乘海空微妙經典觀此身時如路死狗如猛虎毒一切眾生遇見此毒故哀其命以是因緣遠離眾惡亦如其人遠離猛虎爾時海空智藏稽首讚言如是如是實如所說一切諸法悉皆不空以不定故當知諸法亦復不定如是所說真人童子修行一乘海空寶藏聞所不聞云何海空是大寶藏云何寶藏善能運載一切眾生爾時天尊讚海空言善哉善哉善男子若復有人思念總修乃能如汝之所諮問善男子譬如世人有說唱言有海大海有河大河有山大山有地大地有城大城有王大王有人大人有天天有道大道海空亦爾有海空者有大海空有寶藏者有大寶藏云何海空善男

子譬如饑人得少飯食名為安樂如是安樂亦名海空如病瘳愈則得安樂如是安樂亦名海空如是怖畏得依止處則得安樂如是安樂亦名海空善男子譬如貧人得七珍物則得安樂如是安樂亦名海空不得名為大海空藏何以故以饑渴故以貧病故以怖畏故故名安樂故名海空是大海空非大海空善男子若有善信一切眾生或於世俗或於仙道斷諸結盡則得安樂如是安樂亦名海空不得名為大海空藏何以故還生煩惱有習氣故非常樂故善男子若有一人常樂自在乃得名為大海空藏善男子譬如處處能受眾流名為大海隨有百川來往依處是名智藏善男子若有眾生善能了了見於道性則得名為大海空藏以是因緣海空藏者不有不无不生不滅善男子若有大王及以小王經歷年月所不能及隨有之處名為大城傳化眾名為小城隨有轉名為大王隨王化處名為小王小王大王隨方隨化非王非化非大非小如是因緣名為無上轉輪聖王位

於七寶妙麗布有乃得名為大海空藏以是因緣故名海空善男子譬如居士入四種兵不生怖畏當知是人名大衆力若有衆生於三惡道煩惱惡業不生怖畏而能於中廣度衆生當知是人是海空藏若有人能供養父母恭敬道士禮拜燒香修治善法所言誠信无有誑惑能忍難忍患施貧乏是名真人海空智藏何以故海空之藏有大慈悲憐愍一切於諸衆生作大慈父於諸衆生作大慈母能度衆生於生死河能示一乘微妙道相是則名為海空智藏善男子海空寶藏不可思議一切衆生所不能了不能了故不名信受生種種心說種種語是故我今名為海空海空之相唯空與空乃能了空了空之空空而空不了而了以是當知名為海空是名智藏

足道前手執蓮花瞻仰天尊指首問言善哉天尊快說如是甚深義味不可思量云何名為海空智藏海空之空為空不空為不空空不空之空為空空空以是義故為多身空為一身空為微塵空為變化空空義云何為自性空為他性空為自他空以是因緣我等衆中所不能了唯願慈尊持垂哀愍分別解說令諸衆生決了真相爾時

天尊答妙思言善哉善哉善男子汝等衆中為諸衆生作法橋梁作法梯磴作大智門作大依怙是我真實智慧之了是我庫藏若非汝等所不能問若非我者所不能說汝能一心善思善憶故名妙思汝今諦聽汝今諦聽云何名為海空智藏海空之空非空不空亦不空不空空亦非非空空不空空不空空無分別別空故故名海空亦不自空亦不他空不自他空亦不大空亦不小空亦空不空亦大小空亦不多空亦不一空不微塵空不變化空以是義故故名海空海空無我我名海空猶如微塵充滿十方无量世界海空之身實非海空以自在故現微塵身非微塵身亦一塵身滿諸世界海空之身實不滿諸國土世界何以故以无礙故故名海空秘密智藏之身充滿世界智藏之身實非智藏以是因緣海空智藏安住不動隨方示化无量形類各令有心恭敬讚歎欲令衆生各各成辦海空之身常住一方而今他方一切得見海空之身七十二相八十一好亦不得能見色聞聲嗅香別味覺觸知法海空六根悉不能知何以故得自在故海空之心亦无得相何以故无所得故故名海空假使具人妙行童子計有得想是則諸天不得海空海空之空空無得故故名海空海空演說一乘義味經无量劫不可窮盡或說二乘戒定智慧或說三洞微妙經典當爾之時觀不生念我說彼聽亦復不生一句之想何以故我隨衆生說多說少以隨俗故故名海空演說法性善男子譬如虛空虛空之性不可得見海空演說不可得知亦復如是善男子譬如寶

藏多諸珍異種種具足故名智藏三世天尊甚深與藏亦復如是多諸奇異具足無缺是名一乘甚深與藏善男子無邊之物乃名寶藏於寶藏中不可窮盡是名智藏爾時妙思又曰

天尊如是所說實是甚深海空義味成就當來一切眾生皆修寶藏第一功德種種譬喻不可思議大慈天尊云何名為七寶莊嚴具足功德於是

天尊答妙思言善哉善哉善男子云何名為七寶莊嚴具足功德微妙之相善男子莊嚴功德有二種相一內莊嚴二外莊嚴外莊嚴者七十二相八十一好內莊嚴者修行一乘海空秘藏善男子譬如玉山外光顯現內輝素明無量塵沙所不障礙何以故性不移故

故名玉山七寶莊嚴微妙功德亦復如是復次善男子我今方便莊嚴化身大身小身遍滿世界以是大身入一細塵其身爾時亦不隨小雖有真仙莊嚴化身令滿世界而不能以如此大身入細微塵於此時中尚自不能

而况能令心不隨動名仙真者心不隨身善男子真仙童子雖有神力振動世界一切眾生悉得見聞心終不念令是神力偏滿世界使諸眾生皆所不聞而今得聞以是因緣真仙童子亦初不言是我神力能令眾生皆所

不聞而今得聞若有人言因我說法令諸眾生不聞聞者當知是人終不能得平等一乘海空智藏秘密經典何以故眾生不聞我為說者如此之心是生死心一切真仙是心已盡以是義故真仙童子所有身心不相隨逐

善男子一切凡夫身心相隨真仙不爾為化眾生惟現小身心亦不小何以故是我弟子所有心性常廣弘大雖現大身心亦隨大云何大身身滿世界云何小心行嬰兒行雖終日號而不嗷也何以故以是因緣心不隨身真人童子已於色欲遠離諸塵雖住魔城而心不動以不動故當知真仙身心自在現一微塵煩惱之身是諸眾生各見異爾時妙思復白
天尊如是所說真仙童子身心自在住於魔

城而心不動為諸眾生現一微塵煩惱之身以是因緣眾中疑惑真仙童子云何修行而得神力振動眾生令發平等一乘海空秘密寶藏唯願慈尊為諸眾生分別解說令諸我等皆所不聞而今得聞皆所不見而今得見

爾時天尊答妙思言善哉善哉善男子真仙童子云何修行而得神通泐海空藏是諸真仙昔以國城妻子親族七寶庫藏以供養之復以妙音讚歎供養誦讚思惟講說義味以是因緣故能住於宛利世界所有身心不相隨逐何以故離諸我相人相依相作相念相因相果相以是因緣雖住在魔城而心不動善男子若有眾生住於魔城受持一乘海空寶藏秘密經典一句一字如是之人必定得成具足功德處於長樂清淨自在離諸人相我相作相念相善男子若有眾生以其親愛七寶瑠璃以供養之亦復如是以故如是人者知因非因因從因生因無常故生亦無常以是義故遠離講變而供養之善男子若有眾生善男子善女聞海空智藏一句一句不

作字相不作句相不作聞相不作說相如是
義者无相相以无相相故得常樂自在无礙
身心決定必當為十方真仙童子生慈悲心
是名常樂自在之身非身離身亦不身以
是義故真仙童子修行一乘海空智藏微妙

經典決定深理自在之身

爾時妙思復白天尊如所說實是甚深如
是真仙云何福田而得決定常樂自在於是
天尊答言善哉善哉善男子真仙童子云何
福田而得決定常樂自在善男子真人持戒
下至諸仙是名福田若有人言如是等輩是
真福田當知是人則為善根則為善怙无量
衆生之所依怙善男子真仙童子悉觀一切
无量衆生无非福田何以故以善根故故念
衆生是真福田三田六田八田九田如是福
田生无量田隨衆生意分別演說田有四種
云何為四一者不淨田二者淨田三者亦淨
亦不淨田四者亦淨淨田云何不淨田善男
子若施主具持戒法知有慧施如水歸流受
者毀戒著於邪見無施無報以是因緣是名

不淨云何名為淨田善男子施主毀戒著於
邪見言无慧施及以果報受者清廣廣多說
法知有慧施及以福報是名淨田云何亦淨
亦不淨田善男子施者受者俱有持戒廣多
智慧有慧施及施果報是名亦淨云何不淨

施者受者二俱破戒犯於真科生愚闇惑是
名不淨云何名為淨淨田善男子上上施主
施上上田是名淨淨言四種田若有衆生計
心有施待施果報當知是人著於邪見犯諸
禁戒破大乘心若有善人分別演說見施見
受如是之人是名正見若依一乘智藏經典
善見惠施及施果報如是之人是名持戒常
行正見善男子真人童子隨有念處以修習
故隨見衆生持戒破戒施者受者及以果報
以是之故是名持戒是名正見亦復隨見四
種福田及非福田

爾時妙思復白天尊云何名為清淨國土於
是
天尊答妙思言善哉善哉善男子汝等見我
欲運長樂故發斯問正是其時善男子士有

四種云何為四一者不淨二者亦淨不淨三
者淨淨四者非非淨云何不淨善男子若有
衆生貪著受欲邪見誹謗故生下士荆棘毒
草丘墟不平形相醜陋多生諸惡殺害有生
壽命短促是以因緣故生下士是名不淨云

何亦淨不淨善男子一切衆生心情異想或
淨三業或身不淨如是等輩生雜國土是名
亦淨不淨云何淨淨善男子如彼難勝形相
珠好妙麗希有以是因緣是名淨淨云何非
非淨善男子妙樂國土非非不淨為衆生故
種種演說道果清淨非有非无亦非有若无
有衆生修行一乘微妙經典發平等心以此
善根願與仙童共之此土壽命長遠有大勢
力獲大神道以是誓願固緣力故於未來世
得道之時見諸國土非非清淨是名非非淨
是名四種微妙國土善男子若有善人思惟
一乘微妙經典發歡喜心廣度衆生離諸欲
心以此善根願與一切諸衆生等共之此土
遠離諸欲瞋恚愚癡心著一切无有饑渴煩
惱之身

復次善男子生於下士有三種報一者見報二者正報三者餘報云何為見報善男子若有衆生具行十惡違逆父母誹謗大乘微妙經典如是之人身得惡病瘡癢六病龍盲跛病生種種病受種種苦以是義故故名見報云何正報善男子若有衆生受重病死入地獄幽冥冥日生日死无有還期如是之苦名為正報云何餘報善男子從地獄生身受六畜或作鴟梟鸚鵡惡鳥或得鼈龜魚鱉蟹蟲或受獼猴靈鹿豹縱有人身盲闇六疾有人之形无人之情具足十凶諸惡容儀若得出家犯諸重禁違科破戒是名餘報如是等名煩惱餘報如是餘報真人童子以能修習一乘海空微妙經典悉得除滅住真空地

是名清淨微妙之身善男子真人童子常修淨身何以故是諸天人一切衆生之所信伏是故真人修八十一好其身不動令彼衆生隨其所信禮拜恭敬讚歎尊重發平等心以是義故真人童子修清淨身善男子譬如賢臣欲迎大王先當裝嚴宮殿宅舍令得辦具種種甘饍香甘妙味然後大王乃隨其所真人童子亦復如是欲請无上法輪聖王先當修治令清淨者法輪聖王乃隨其處香味淨甘天廚妙饍善能供養王大歡喜即唱讚言善哉善哉我今受供種種香味設大莊嚴微妙寶座我今思惟以是妙香當給貧乏一切衆生令得飽足无饑渴想善男子真人童子亦復如是清淨身心奉請无上一乘海空甘露法味利益一切諸衆生故无不歡喜善男子譬如春月天降甘雨草木大小悉皆萌芽海空法味亦復如是善男子若有衆生清淨心者於一念中即變現身住海空地得金剛身斷斷十方三十二天諸有煩惱何以故金剛清淨見不見相雖見男女无男女相雖見

色法无色法相雖見晝夜无晝夜相雖見煩惱无煩惱相雖見海空无海空相何以故善男子一切諸法亦无相故如幻如夢如電石先真人童子以是因緣見不見相住相不住相是故名為住海空地於是四衆聞是說已俱起作禮歡喜踴躍奉辭而退

太上一乘海空智藏經卷之二